

四庫全書

經部

欽定四庫全書

春秋尊王發微卷九

宋 孫復 撰

襄公名午成公子簡王十四年即位襄謚也因
事有功曰襄

元年春王正月公即位仲孫蔑會晉欒黶宋華元衛甯
殖曹人莒人邾人滕人薛人圍宋彭城

仲孫蔑會諸侯之大夫圍宋彭城討魚石也魚石成

十五年奔楚十八年復入于彭城蓋楚子伐宋取彭城使魚石守之以逼宋爾夫彭城宋邑也魚石宋叛臣也楚子伐宋取宋邑使宋叛臣守之以逼宋其惡可知也故雖入于楚孔子還繫之于宋所以抑彊夷而黜叛臣也

夏晉韓厥帥師伐鄭仲孫蔑會齊崔杼曹人邾人杞人次于鄆

韓厥伐鄭故諸大夫次于鄆以備楚鄆鄭地

秋楚公子壬夫帥師侵宋

楚師侵宋所以救鄭也

九月辛酉天王崩邾子來朝冬衛侯使公孫剽

匹妙反

來

聘晉侯使荀瑩來聘

天王崩邾子來朝衛侯使公孫剽來聘晉侯使荀瑩
來聘皆不臣也

二年春王正月葬簡王

五月而葬

鄭師伐宋夏五月庚寅夫人姜氏薨

成公夫人

六月庚辰鄭伯踰卒晉師宋師衛甯殖侵鄭秋七月仲
孫蔑會晉荀瑩宋華元衛孫林父曹人邾人于戚

會于戚謀鄭也

己丑葬我小君齊姜

齊諡也三月而葬

叔孫豹如宋

叔孫豹僑如弟

冬仲孫蔑會晉荀瑩齊崔杼宋華元衛孫林父曹人邾人滕人薛人小邾人于戚遂城虎牢

冬荀瑩再會于戚遂城虎牢以偪鄭鄭乃求成虎牢鄭邑也不繫之鄭者與荀瑩城之也鄭叛去中國與楚比周荀瑩再會于戚城虎牢以偪之然後乃服故不繫之于鄭使若自城中國之邑然城虎牢服鄭以安中國善也乘人之喪取人之邑此其可哉故曰遂

城虎牢以惡之也

楚殺其大夫公子申

三年春楚公子嬰齊帥師伐吳

吳楚皆夷楚公子嬰齊伐吳者吳與中國故也成十
五年叔孫僑如會晉士燮齊高無咎宋華元衛孫林
父鄭公子鮑邾人會吳于鍾離是也

公如晉夏四月壬戌公及晉侯盟于長樗

晉侯出其國都與公盟于外地

公至自晉六月公會單子晉侯宋公衛侯鄭伯莒子邾子齊世子光己未同盟于雞澤陳侯使袁僑如會戊寅叔孫豹及諸侯之大夫及陳袁僑盟

先言公會單子晉侯宋公衛侯鄭伯莒子邾子齊世子光己未同盟于雞澤次言陳侯使袁僑如會戊寅叔孫豹及諸侯之大夫及陳袁僑盟者此諸侯既盟而陳袁僑至也諸侯既盟而陳袁僑至無盟可也已未諸侯盟戊寅大夫又盟是大夫彊諸侯始失政也

故十六年公會晉侯宋公衛侯鄭伯曹子莒子邾子
薛伯杞伯小邾子于澠梁戊寅大夫盟不復言諸侯
之大夫不復言諸侯之大夫者政在大夫故也故孔
子曰祿之去公室五世矣政逮於大夫四世矣孔子
之言非獨魯也滔滔者天下皆是也

秋公至自會冬晉荀瑩帥師伐許

四年春王三月己酉陳侯午卒夏叔孫豹如晉秋七月
戊子夫人如氏薨

襄公妾母如氏

葬陳成公八月辛亥葬我小君定如

定謚也二月而葬

冬公如晉陳人圍頓

五年春公至自晉夏鄭伯使公子發來聘叔孫豹鄆世子如晉

外如不書鄆世子書者以同吾叔孫豹如晉也

仲孫蔑衛孫林父會吳于善道秋大雩楚殺其大夫公

子壬夫公會晉侯宋公陳侯衛侯鄭伯曹伯莒子邾子
滕子薛伯齊世子光吳人鄆人于戚

吳稱人序鄆上者進之也案成六年吳伐邾始見于
經十五年會于鍾離此年會于善道又會于戚數與
中國故進之稱人以此小國鄆亦小國也然鄆微弱
滋甚不可先也故吳序鄆上

公至自會冬戍陳

此會戚諸侯戍陳也不言諸侯者魯戍之也諸侯急

于救患成之與僖二年城楚丘義同

楚公子貞帥師伐陳

陳即中國也三年陳侯使袁僑如會

公會晉侯宋公衛侯鄭伯曹伯齊世子光救陳十有二月公至自救陳辛未季孫行父卒

六年春王三月壬午杞伯姑容卒夏宋華弱來奔秋葬杞桓公滕子來朝莒人滅鄆

昭四年書取鄆此而言滅者蓋莒滅之以為附庸爾

冬叔孫豹如邾季孫宿如晉

季孫宿行父子

十有二月齊侯滅萊

七年春邾子來朝夏四月三卜郊不從乃免牲小邾子

來朝城費音秘

費季氏邑季氏四月城所食邑其專可知也

秋季孫宿如衛八月螽冬十月衛侯使孫林父來聘壬戌及孫林父盟楚公子貞帥師圍陳十有二月公會晉

侯宋公陳侯衛侯曹伯莒子邾子于郕

于執反又音几吹反

楚公子貞圍陳故諸侯復會于郕鄭地

鄭伯髡頑如會未見諸侯丙戌卒于郕

七報反又采南反

卒不名者一見之也上言鄭伯髡頑如會下言未見諸侯丙戌卒于郕此鄭伯髡頑可知也二十五年吳子遏伐楚門于巢卒同此郕鄭邑

陳侯逃歸

案三年晉合諸侯同盟于雞澤陳侯使袁僑如會以

即中國故楚公子貞五年帥師伐陳此年帥師圍陳
晉再合諸侯于鄆不能為攘楚以安中國故陳侯逃
歸陳侯以是逃歸者晉不足與也言逃懼楚之甚
八年春王正月公如晉

公前年會諸侯于鄆不至者公自鄆朝晉也

夏葬鄭僖公鄭人侵蔡獲蔡公子燮季孫宿會晉侯鄭
伯齊人宋人衛人邾人于邢丘

邢丘之會公在晉也晉侯不與公會而與季孫宿會

者襄公微弱政在季氏故也晉為盟主弃其君而與臣何以宗諸侯此晉侯之惡亦可見矣

公至自晉莒人伐我東鄙秋九月大雩冬楚公子貞帥師伐鄭

夏鄭人侵蔡故楚公子貞伐鄭鄭與楚平晉侯使士匄來聘

九年春宋災夏季孫宿如晉五月辛酉夫人姜氏薨宣公夫人成公母

秋八月癸未葬我小君穆姜

穆謚也四月而葬

冬公會晉侯宋公衛侯曹伯莒子邾子滕子薛伯杞伯
小邾子齊世子光伐鄭

鄭即楚故諸侯伐鄭取成而還

十有二月己亥同盟于戲

許宜反

楚子伐鄭

鄭復與楚平

十年春公會晉侯宋公衛侯曹伯莒子邾子滕子薛伯

杞伯小邾子齊世子光會吳于柤

吳五年會于戚稱人此不稱人者以其遂滅偃陽反狄之也柤楚地

夏五月甲午遂滅偃陽

偃陽微國諸侯不義遠會彊夷以滅微國甚矣

公至自會楚公子貞鄭公孫輒帥師伐宋晉師伐秦

秋莒人伐我東鄙公會晉侯宋公衛侯曹伯莒子邾子齊世子光滕子薛伯杞伯小邾子伐鄭

楚公子貞鄭公孫輒帥師伐宋故公會晉侯宋公衛侯曹伯莒子邾子齊世子光滕子薛伯杞伯小邾子伐鄭

冬盜殺鄭公子騂公子發公孫輒

盜者微賤之稱盜一日而殺三卿故列數之惡鄭伯失刑政也

戌音庶鄭虎牢

此伐鄭諸侯戌鄭虎牢也不言諸侯者諸侯不一怠

于救患也案二年仲孫蔑于戚遂城虎牢不言鄭今
成虎牢言鄭者諸侯與楚爭鄭久矣諸侯之得鄭者
亦已數矣而不能有之隨為楚取是諸侯之無能也
故虎牢雖為諸侯所成孔子還繫于鄭

楚公子貞帥師救鄭公至自伐鄭

十有一年春王正月作三軍

作三軍亂聖王之制也古者天子六軍大國三軍次
國二軍小國一軍魯次國以次國而作三軍亂聖王

之制何也

夏四月四卜郊不從乃不郊鄭公孫舍之帥師侵宋公會晉侯宋公衛侯曹伯齊世子光莒子邾子滕子薛伯杞伯小邾子伐鄭秋七月己未同盟于亳城北

諸侯伐鄭公孫舍之侵宋未已也鄭人諸侯七月己未同盟于亳城北亳城北鄭地

公至自伐鄭楚子鄭伯伐宋公會晉侯宋公衛侯曹伯齊世子光莒子邾子滕子薛伯杞伯小邾子伐鄭會于

蕭魚

鄭伯尋背亳城之盟為楚子伐宋故晉悼復以諸侯
伐鄭鄭人大懼乃歸中國言伐言會者得鄭伯之辭
也下楚人執鄭行人良霄此得鄭伯可知也案鄭自
齊威晉文死或即荆楚或歸中國晉楚之爭鄭者可
謂久矣晉悼比歲大合諸侯伐鄭今始得之雖不能
遠斥強楚以紹二伯之烈然自是能有鄭者二十年
此晉悼之績亦可道也蕭魚鄭地

公至自會楚人執鄭行人良霄

鄭伯使良霄告急于楚楚師未出鄭伯與諸侯會于
蕭魚故楚人執鄭行人良霄

冬秦人伐晉

十有二年春王三月莒人伐我東鄙圍台

勅才反又音
臺又音怡

莒背蕭魚之會伐我東鄙圍台

季孫宿帥師救台遂入鄆

音運

季孫宿受命救台不受命入鄆季孫宿帥師救台遂

入鄆專也

夏晉侯使士魴來聘秋九月吳子乘卒

不書葬者罪大惡重貶之也

冬楚公子貞帥師侵宋公如晉

十有三年春公至自晉夏取郛

音詩

郛小國

秋九月庚辰楚子審卒冬城防

十有四年春王正月季孫宿叔老會晉士匄齊人宋人

衛人鄭公孫蠆曹人莒人邾人滕人薛人杞人小邾人

會吳子向

舒亮反

吳至此猶不稱人者滅偃陽之後未有可進叔老公
孫嬰齊子向宋地

二月乙未朔日有食之夏四月叔孫豹會晉荀偃齊人
宋人衛北宮括鄭公孫蠆曹人莒人邾人滕人薛人杞
人小邾人伐秦

會向伐秦齊宋衛稱人微者也

已未衛侯出奔齊

不名者甯殖孫林父逐之也

莒人侵我東鄙秋楚公子貞帥師伐吳冬季孫宿會晉士匄宋華閱衛孫林父鄭公孫蠆莒人邾人于戚

十有五年春宋公使向戌來聘二月己亥及向戌盟于

劉

劉魯地

劉夏逆王后于齊

天子不親迎取后則三公逆之劉夏士也王后天下
母使微者逆之可哉故曰劉夏逆王后于齊以著其
惡劉采地夏名

夏齊侯伐我北鄙圍成公救成至遇

公救成至遇不敢進也遇魯地

季孫宿叔孫豹帥師城成郭秋八月丁巳日有食之邾
人伐我南鄙冬十有一月癸亥晉侯周卒

十有六年春王正月葬晉悼公三月公會晉侯宋公衛

侯鄭伯曹伯莒子邾子薛伯杞伯小邾子于湫

古役反又音公

壁反梁戊寅大夫盟

案三年公會單子晉侯宋公衛侯鄭伯莒子邾子齊世子光己未同盟于雞澤陳侯使袁僑如會戊寅叔孫豹及諸侯之大夫及陳袁僑盟言諸侯之大夫此直曰戊寅大夫盟不言諸侯之大夫者雞澤之會諸侯始失政也至于湫梁則又甚矣湫梁之會政在大夫也政在大夫故不言諸侯之大夫不言諸侯之大

夫者大夫無諸侯故也湟梁晉地

晉人執莒子邾子以歸

晉平湟梁之會方退執莒子邾子以歸又不歸于京師非所以宗諸侯也

齊侯伐我北鄙夏公至自會五月甲子地震叔老會鄭伯晉荀偃衛甯殖宋人伐許秋齊侯伐我北鄙圍成大雩冬叔孫豹如晉

十有七年春王二月庚午邾子貜

苦耕反又音戶耕反卒

前年晉人執莒子邾子以歸此書邾子捭卒者晉人
人尋赦之也莒子同此

宋人伐陳夏衛石買帥師伐曹秋齊侯伐我北鄙圍桃
高厚帥師伐我北鄙圍防

案十五年齊侯伐我北鄙圍成十六年齊侯伐我北
鄙圍成此年齊侯伐我北鄙圍桃高厚伐我北鄙圍
防三年之中君臣加兵于魯者四此齊之不道亦可
知也

九月大雩宋華臣出奔陳冬邾人伐我南鄙

十有八年春白狄來夏晉人執衛行人石買秋齊師伐我北鄙冬十月公會晉侯宋公衛侯鄭伯曹伯莒子邾子滕子薛伯杞伯小邾子同圍齊

齊為不道數侵諸侯故諸侯同圍之言同者諸侯同心疾齊也

曹伯負芻卒于師楚公子午帥師伐鄭

十有九年春王正月諸侯盟于祝柯晉人執邾子公至

自伐齊取邾田自漵

虎百反又音郭音
靡又音口獲反水

諸侯土地受之天子不可取也言取惡內也自漵水者隨漵水為界也

季孫宿如晉葬曹成公夏衛孫林父帥師伐齊秋七月辛卯齊侯環卒晉士匄帥師侵齊至穀聞齊侯卒乃還非禮也宣成而下政在大夫故士匄受命侵齊聞齊侯卒乃還也噫不伐喪善也士匄貪不伐喪之善以廢君命惡也故曰晉士匄帥師侵齊至穀聞齊侯卒

乃還以惡之

八月丙辰仲孫蔑卒齊殺其大夫高厚鄭殺其大夫公子嘉冬葬齊靈公城西郭叔孫豹會晉士匄于柯城武城

城西郭城武城懼齊也

二十年春王正月辛亥仲孫速會莒人盟于向

仲孫速仲孫蔑子

夏六月庚申公會晉侯齊侯宋公衛侯鄭伯曹伯莒子

邾子滕子薛伯杞伯小邾子盟于澶

音淵

齊平故也

秋公至自會仲孫速帥師伐邾

仲孫速背澶淵之盟伐邾

蔡殺其大夫公子燮蔡公子履出奔楚陳侯之弟黃出奔楚叔老如齊冬十月丙辰朔日有食之季孫宿如宋二十有一年春王正月公如晉邾庶其以漆閭丘來奔庶其邾大夫不氏未命也漆閭丘邾邑昭五年莒牟

夷以牟婁及防滋來奔同此書者惡魯受邾叛人邑
夏公至自晉秋晉欒盈出奔楚九月庚戌朔日有食之
冬十月庚辰朔日有食之曹伯來朝公會晉侯齊侯宋
公衛侯鄭伯曹伯莒子邾子于商任音壬

商任地闕

二十有二年春王正月公至自會夏四月秋七月辛酉
叔老卒冬公會晉侯齊侯宋公衛侯鄭伯曹伯莒子邾
子薛伯杞伯小邾子于沙隨公至自會楚殺其大夫公

子追舒

二十有三年春王二月癸酉朔日有食之三月己巳杞伯勾卒夏邾畀我來奔

此言邾畀我來奔者惡內也惡鄉受邾叛人邑今又納邾叛人也

葬杞孝公陳殺其大夫慶虎及慶寅陳侯之弟黃自楚歸于陳

出自稱弟者無失弟之道也黃奔楚在二十年

晉欒盈復入于晉入于曲沃

此欒盈以曲沃之甲入晉敗而奔曲沃也經言欒盈復入于晉入于曲沃者欒盈復入于晉犯君當誅曲沃大夫不可納也入于曲沃明曲沃大夫納之當坐盈出奔楚在二十一年

秋齊侯伐衛遂伐晉

齊侯伐衛遂伐晉背澶淵之盟在二十年

八月叔孫豹帥師救晉次于雍

於用榆

次止也言救言次惡不急救患也君命救晉豹畏齊廢命而止故曰叔孫豹帥師救晉次于雍榆以惡之雍榆晉地

己卯仲孫速卒

孟莊子也

冬十月乙亥臧孫紇出奔邾晉人殺欒盈

不言其大夫者欒盈出奔楚當絕也稱人以殺從討

賊辭

齊侯襲莒

二十有四年春叔孫豹如晉仲孫羯帥師侵齊

羯仲孫速子孟孝伯也

夏楚子伐吳秋七月甲子朔日有食之既齊崔杼帥師
伐莒大水八月癸巳朔日有食之公會晉侯宋公衛侯
鄭伯曹伯莒子邾子滕子薛伯杞伯小邾子于夷儀
諸侯會于夷儀謀齊也

冬楚子蔡侯陳侯許男伐鄭公至自會陳鍼其庶反宜咎

出奔楚叔孫豹如京師大饑

五穀不升之甚

二十有五年春齊崔杼帥師伐我北鄙夏五月乙亥齊崔杼弑其君光公會晉侯宋公衛侯鄭伯曹伯莒子邾子滕子薛伯杞伯小邾子于夷儀

晉再合諸侯將伐齊齊人懼弑莊公以求成晉侯許之八月己巳諸侯同盟于重丘是也莊公復背澶淵之盟加兵晉衛信不道矣然齊人弑莊公以求成逆

之大者晉侯不能即而討之以成齊國之亂曷以宗諸侯宜乎大夫日熾自是卒不可制也故先書崔杼之弑以著其惡

六月壬子鄭公孫舍之帥師入陳

前年楚子蔡侯陳侯許男伐鄭故鄭公孫舍之帥師入陳

秋八月己巳諸侯同盟于重丘公至自會衛侯入于夷儀

此衛侯伋也入于夷儀將篡

剽匹妙反

楚屈建帥師滅舒鳩冬鄭公孫夏帥師伐陳十有二月

吳子遏伐楚門于巢卒

吳子伐楚自攻于巢之門巢人伏而殺之故曰吳子
遏伐楚門于巢卒惡吳子之自輕也卒不名者與七
年鄭伯髡頑義同

二十有六年春王二月辛卯衛甯喜弑其君剽衛孫林
父入于戚以叛

獻公之奔齊也孫林父逐之甯喜弑剽

匹奴反

以納獻

公故林父懼入于戚以叛

甲午衛侯衎復歸于衛

先言辛卯衛甯喜弑其君剽後言甲午衛侯衎復歸于衛者以見衎待弑而歸也案十四年衛侯衎出奔齊前年入于夷儀今喜弑剽四日而復歸于衛此待弑而歸可知也

夏晉侯使荀吳來聘公會晉人鄭良霄宋人曹人于澶

音
淵秋宋公殺其世子痤

才禾反

稱君以殺世子甚之也

晉人執衛甯喜

晉人執衛甯喜惡不討也弑君之賊人人皆得殺之
八月壬午許男甯卒于楚冬楚子蔡侯陳侯伐鄭葬許
靈公

二十有七年春齊侯使慶封來聘夏叔孫豹會晉趙武楚
屈建蔡公孫歸生衛石惡陳孔奐鄭良霄許人曹人于宋

隱威之際天子失道諸侯擅權宣成之間諸侯僭命
大夫專國至宋之會則又甚矣何哉自宋之會諸侯
日微天下之政中國之事皆大夫專持之也故二十
九年城杞三十年會澶淵昭元年會號諸侯莫有見
者此天下之政中國之事皆大夫專持之可知也

衛殺其大夫甯喜衛侯之弟鱣

市轉反
又音專

出奔晉

甯喜不以討賊辭書者獻公殺之不以其罪也初甯
殖與孫林父逐獻公以立公孫剽既而悔焉甯殖死

故喜與公弟鱄謀弑剽以納獻公獻公歸一旦復討
逐已者于是殺甯喜其弟鱄曰吾與喜納君也殺之
遂出奔晉

秋七月辛巳豹及諸侯之大夫盟于宋

案十六年公會晉侯宋公衛侯鄭伯曹伯莒子邾子

薛伯杞伯小邾子于渙

古役反

梁戊寅大夫盟渙梁之

會諸侯會也而曰戊寅大夫盟者大夫無諸侯也此
年叔孫豹會晉趙武楚屈建蔡公孫歸生衛石惡陳

孔奐鄭良霄許人曹人于宋秋七月辛巳豹及諸侯
之大夫盟于宋宋之會大夫會也大夫會而言辛巳
豹及諸侯之大夫盟于宋者不與大夫無諸侯也噫
天下之政中國之事諸侯專之猶曰不可況大夫乎
故宋之盟不與大夫無諸侯也宋之盟不與大夫無
諸侯者孔子傷天下之亂疾之之甚也豹不氏前見也
冬十有二月乙亥朔日有食之

二十有八年春無冰

夏衛石惡出奔晉邾子來朝秋八月大雩仲孫羯如晉
冬齊慶封來奔十有一月公如楚

公朝楚者桓文既死時無盟主中國日微故公遠朝
強楚也

十有二月甲寅天王崩

靈王也

乙未楚子昭卒

二十有九年春王正月公在楚

案成十年秋七月公如晉十一年三月公至自晉昭十五年冬公如晉十六年夏公至自晉皆不書所在公在中國猶可在楚國則甚矣故詳而錄之也

夏五月公至自楚

公留于楚者七月

庚午衛侯衎卒閹弑吳子餘祭

側界反

閹門者不言盜者閹微子盜也不言弑者明弑有漸也微者猶能弑吳子餘祭况大者乎則知為人君者

雖微不可慢也故曰閹弑吳子餘祭以惡之

仲孫羯會晉荀盈齊高止宋華定衛世叔儀鄭公孫段
曹人莒人滕人薛人小邾人城杞

杞微弱不能自城故諸侯之大夫相與城杞諸侯之
大夫相與城杞者政在大夫故也

晉侯使士鞅來聘杞子來盟吳子使札來聘

吳成六年伐郟始見于經稱吳襄五年會于戚稱人
今使札來聘稱子者與其慕義來聘進之也先書閹

弑吳子餘祭而後言吳子使札來聘者吳子使札來聘未至于魯而吳子遇弑故先書聞弑吳子餘祭也吳子既弑而札至于魯故後書吳子使札來聘

秋九月葬衛獻公齊高止出奔北燕冬仲孫羯如晉

三十年春王正月楚子使薳

音委罷皮

來聘夏四月蔡世

子般

音班

弑其君固

稱世子以弑甚般之惡也不言其父而言其君者君之子世子有君之尊也有父之親也以般之子尊親

盡矣不日者脫之

五月甲午宋災宋伯姬卒天王殺其弟佞夫

春秋之義天子得專殺故二百四十二年無天王殺大夫文此言殺其弟佞夫者書稱帝堯克明俊德以親九族九族既睦平章百姓而景王不能容一母弟不可不見也且諸侯有失教及不能友愛其弟出奔者孔子猶詳而錄之譏其失兄之道况景王尊為天子富有四海乎故斥言天王殺其弟佞夫以惡之也

王子瑕奔晉

景王重失親親不言出周無外也

秋七月叔弓如宋葬宋共姬

共諡也內女不葬葬者皆非常也莊四年齊侯葬紀伯姬三十年葬紀叔姬此年叔弓如宋葬共姬是也案文九年叔孫得臣如京師葬襄王昭二十二年叔鞅如京師葬景王共姬婦人也襄王景王天子也魯皆使卿會葬惡之甚焉然內女葬當有恩禮使卿則

不可也叔弓叔老子

鄭良霄出奔許自許入于鄭鄭人殺良霄

鄭人殺良霄不言大夫者出奔絕之也

冬十月葬蔡景公晉人齊人衛人鄭人莒人

邾人滕人薛人杞人小邾人會于澶

音蟬

淵宋災故

會未有言其所為者此言宋災故者疾之之辭也宋災故天下諸侯莫有憂者而大夫憂之天下諸侯莫有憂者而大夫憂之諸侯微弱政在大夫可知也其

曰某人者以其專極惡甚故曰某人某人會于澶淵
宋災故貶也

三十有一年春王正月夏六月辛巳公薨于楚宮

非正也公朝楚好其宮歸而作之


秋九月癸巳子野卒

襄公太子未踰年之君也名者襄公未葬也不薨不
地降成君也

己亥仲孫羯卒冬十月滕子來會葬

滕子來會葬非禮也

癸酉葬我君襄公十有一月莒人弑其君密州



春秋尊王發微卷九

欽定四庫全書

經部

春秋尊王發微卷十二

詳校官給事中臣戴璐

給事中臣溫常綬覆勘

覆校官主事臣龔敬身

校對官中書臣蔣寬

謄錄監生臣朱楷

欽定四庫全書

春秋尊王發微卷十

宋 孫復 撰

昭公名稠襄公子景王四年即位昭謚也容儀

恭明曰昭

元年春王正月公即位叔孫豹會晉趙武楚公子圍齊

國弱宋向戌衛齊惡陳公子招

音韶

蔡公孫歸生鄭罕

虎許人曹人于虢三月取鄆夏秦伯之弟鍼出奔晉六

月丁巳邾子華卒晉荀吳帥師敗狄于大鹵

大鹵大原

秋莒去

起呂反

疾自齊入于莒莒展輿出奔吳

莒子二子長曰去疾次曰展輿莒子遇弑去疾奔齊
展輿立國人不與去疾由齊入于莒故展輿奔吳莒
子弑在襄三十一年

叔弓帥師疆鄆田

帥師而往有畏也

葬邾悼公冬十有一月己酉楚子麇

音君

卒楚公子比

出奔晉

二年春晉侯使韓起來聘夏叔弓如晉秋鄭殺其大夫
公孫黑冬公如晉至河乃復

公如晉至河乃復者六此年公如晉至河乃復十二
年公如晉至河乃復十三年公如晉至河乃復二十
一年公如晉至河乃復二十三年公如晉至河有疾
乃復定三年公如晉至河乃復是也唯二十三年書

有疾明有疾而反餘皆譏公數如晉見距不能以禮
自重大取困辱也

季孫宿如晉

公如晉而距之季孫宿如晉而納之是昭公季孫宿
之不若也此晉侯之惡亦可見矣

三年春王正月丁未滕子原卒夏叔弓如滕五月葬滕
成公

滕小國使叔弓會葬甚矣

秋小邾子來朝八月大雩冬大雨

于附反

雹北燕伯欵出

奔齊

四年春王正月大雨

于附反

雹夏楚子蔡侯陳侯鄭伯許

男徐子滕子頓子胡子沈子小邾子宋世子佐淮夷會

于申

中國自宋之會政在大夫諸侯不見者十年此書楚

子蔡侯陳侯鄭伯許男徐子滕子頓子胡子沈子小

邾子宋世子佐淮夷會于申者楚子大合諸侯于此

也楚子得以大合諸侯于此者威文既死諸夏不振
喪亂日甚幅裂橫潰制在荆蠻故也故自是天下之
政中國之事皆荆蠻迭制之至于平丘召陵之會諸
侯雖云再出尋復叛去事無所救不足道也宋盟在
襄二十七年會平丘在昭十三年會召陵在定四年
申姜姓國

楚人執徐子秋七月楚子蔡侯陳侯許男頓子胡子沈
子淮夷伐吳執齊慶封殺之

案宣十一年楚人殺陳夏徵舒稱人以殺討賊辭也此不言楚人執齊慶封殺之者不與楚討也慶封與弑莊公弑君之賊人人皆得殺之其言不與楚討者楚靈貪虐不道殄滅陳蔡以肆其欲故孔子以諸侯共執齊慶封殺之為文所以與殺陳夏徵舒異也崔杼弑莊公在襄二十五年

遂滅賴

賴小國

九月取鄆

才陵反

案襄六年莒人滅鄆此言取鄆者蓋莒滅鄆以為附庸今魯取之爾

冬十有二月乙卯叔孫豹卒

五年春王正月舍中軍

魯本二軍襄十一年作三軍今舍中軍作之非舍之非皆非天子命也

楚殺其大夫屈

居勿反

申公如晉夏莒牟夷以牟婁及防

茲來奔

莒牟夷以牟婁及防茲來奔惡內也與襄二十一年

邾庶其以漆間丘來奔義同

秋七月公至自晉戊辰叔弓帥師敗莒師于蚡

反扶粉

泉

魯既受莒叛人邑又敗莒師于蚡泉其惡可知也蚡

泉魯地

秦伯卒冬楚子蔡侯陳侯許男頓子沈子徐人越人伐

吳

六年春王正月杞伯益姑卒葬秦景公夏季孫宿如晉

葬杞文公宋華合比

如字又音被

出奔衛秋九月大雩楚薳

罷

音皮

帥師伐吳冬叔弓如楚齊侯伐北燕

七年春王正月暨齊平

暨不得已也齊來求平不得已而從之故曰暨且明

非魯志也

三月公如楚叔孫婁如齊涖盟夏四月甲辰朔日有食之秋八月戊辰衛侯惡卒九月公至自楚冬十有一月

癸未季孫宿卒十有二月癸亥葬衛襄公

八年春陳侯之弟招

音韶

殺陳世子偃師

此陳公子招殺陳世子偃師也其曰陳侯之弟招殺陳世子偃師者親之也所以甚招之惡也陳哀公二子太子偃師次子留公弟招與大夫過皆愛留欲立之哀公疾遂殺太子偃師以立之留庶孽也偃師冢嗣也招以叔父之親不顧宗社之重殞冢嗣以立庶孽致楚滅陳皆招之由也故曰陳侯之弟招殺陳世

子偃師以甚招之惡也

夏四月辛丑陳侯溺卒叔弓如晉楚人執陳行人于徵師殺之陳公子留出奔鄭

陳哀公卒于徵師赴于楚且告立公子留楚人執于徵師殺之故公子留出奔鄭公子留已立復稱公子者以著公弟招殺世子偃師之罪且明留之立不當立也

秋蒐于紅

蒐春田秋非禮也惟不稱大之為正耳紅魯地

陳人殺其大夫公子過

古未反

此公子招殺大夫公子過也其言陳人殺其大夫公子過者不與公子招殺也故以陳人自討為文

大雩冬十月壬午楚師滅陳執陳公子招

音韶

放之于

越殺陳孔魚

陳公子招殺世子之賊也楚子執而放之陳孔魚無罪之人也楚子殺之吁楚靈暴虐無道滅人之國又

為淫刑也如此

葬陳哀公

十月壬午楚師滅陳此言葬陳哀公如不滅之辭者
楚子葬之也不言楚子葬之者不與楚子滅陳葬哀
公故以陳人自葬為文所以存陳也九年陳災同此
九年春叔弓會楚子于陳許遷于夷夏四月陳災秋仲

孫饒

俱縛反又
音居碧反

如齊

饒仲孫羯子

冬築郎園

十年春王正月夏齊藥施來奔秋七月季孫意如叔弓

仲孫矍

居縛反又音居碧反

帥師伐莒

三卿伐莒疾莒之甚也季孫意如季孫宿孫

戊子晉侯彪卒九月叔孫婼如晉葬晉平公十有二月

甲子宋公成卒

此年無冬者脫也

十有一年春王二月叔弓如宋葬宋平公夏四月丁巳

楚子虔誘蔡侯般

音班

殺之于申

般弑逆之人諸侯皆得殺之楚子名者楚子暴虐無道貪蔡土地不以弑君之罪殺般也四月丁巳楚子虔誘蔡侯般殺之于申十有一月丁酉楚師滅蔡執蔡世子有以歸用之此暴虐無道貪蔡土地不以弑君之罪殺般可知也然般之罪不容誅矣楚子殺之不以其罪故生而名之不得以討賊例當坐誘殺蔡侯般也般弑在襄三十年

楚公子弃疾帥師圍蔡五月甲申夫人歸氏薨

昭公母胡女歸姓

大蒐于比

毗音蒲

蒐春田也五月不時也時又有夫人之喪比蒲魯地

仲孫矪會邾子盟于侵

音浸又音侵

祥

侵祥地闕

秋季孫意如會晉韓起齊國弱宋華亥衛北宮佗

徒何反

鄭罕虎曹人杞人于厥慙

魚靳反又音五巾反又音五轄反

會于厥慙欲救蔡而不能也厥慙地闕

九月己亥葬我小君齊歸冬十有一月丁酉楚師滅蔡
執蔡世子有以歸用之

諸侯在喪稱子此言世子有者有未立也案四月丁
巳楚子虔誘蔡侯般殺之于申楚公子弃疾帥師圍
蔡十有一月丁酉楚師滅蔡執蔡世子有以歸用之
有窮迫危懼以至于死此未立可知也故曰世子噫
楚子既誘蔡侯般殺之于申又滅蔡執蔡世子有以

歸用之甚矣楚靈之惡其若此也

十有二年春齊高偃帥師納北燕伯于陽

北燕伯三年出奔齊不言納于燕者明未得國都也
陽燕別邑

三月壬申鄭伯嘉卒夏宋公使華定來聘公如晉至河
乃復五月葬鄭簡公楚殺其大夫成熊秋七月冬十月

公子慙

魚靳反
讀為整

出奔齊楚子伐徐晉伐鮮虞

直曰晉伐鮮虞者楚靈不道殄滅陳蔡晉為盟主既

不能救其惡已甚今又與楚交伐同姓無復天理之存矣故深惡之鮮虞姬姓國

十有三年春叔弓帥師圍費

音秘

費季氏邑不言家臣叛者言圍則叛可知也

夏四月楚公子比自晉歸于楚弑其君虔于乾谿

先言歸而後言弑者先言歸者明比不與謀也後言弑者正比之罪也初楚子麇卒靈王即位公子比出奔晉靈王無道公子弃疾作亂召公子比于晉立之

以弑靈王故曰楚公子比自晉歸于楚弑其君虔于
乾谿也比靈王弟奔晉在元年乾谿楚地

楚公子弃疾殺公子比

比不以討賊辭書者殺之不以其罪也弃疾雖召公
子比為王其實內自窺楚于是殺公子比自立故曰
楚公子弃疾殺公子比以著其惡比已立復稱公子
者明比之立不當立也

秋公會劉子晉侯齊侯宋公衛侯鄭伯曹伯莒子邾子

滕子薛伯杞伯小邾子于平丘八月甲戌同盟于平丘

公不與

音預

盟

自宋之會諸侯不出大夫專盟會者十年至申之會則又甚矣楚子以蠻夷之衆橫行中國戕滅陳蔡以厭其欲諸侯莫敢伉楚子專盟會者又十年矣今晉昭一旦與劉子合諸侯同盟于此者其能與楚子伉乎不能與楚子伉也乘楚靈弑逆之禍爾乘楚靈弑逆之禍與劉子合諸侯同盟于此何所為哉此固不

足道也公不與盟者晉侯不與公盟也晉侯與公同
事而不同盟非所以宗諸侯也天下孰不解體故自
是訖會召陵諸侯復不出者二十四年至如鄭音專
轉反又陵之會晉自不出此不足宗諸侯可知也宋
之會在襄二十七年申之會在昭四年鄭陵之會在
昭二十六年會召陵在定四年平丘晉地

晉侯執季孫意如以歸

晉既不與公盟又執季孫意如以歸其惡可知

公至自會蔡侯廬歸于蔡陳侯吳歸于陳

案八年楚師滅陳十一年楚滅蔡此言蔡侯廬歸于蔡陳侯吳歸于陳者楚平復二國之後也楚靈不道暴滅陳蔡楚平既立將矯楚靈之惡以說諸夏也故復二國之後然則楚靈滅之楚平復之善與非善也聖王不作諸侯不振二國之命制在荆蠻故也孔子以陳蔡自歸為文所以抑強楚而存諸夏也冬十月葬蔡靈公公如晉至河乃復吳滅州來

州來附庸

十有四年春意如至自晉

大夫執則至至則名不稱氏前見也

三月曹伯滕卒夏四月秋葬曹武公八月莒子去疾卒
冬莒殺其公子意恢

十有五年春王正月吳子夷末卒二月癸酉有事于武
宮籥入叔弓卒去樂卒事

有事于武宮籥入叔弓卒去樂卒事非禮也宗廟之

祭羽籥既陳雖有卿佐之喪不可去也然卿佐之喪
當有恩禮去樂則太甚故為之廢繹是故宣八年書
六月辛巳有事于太廟仲遂卒于垂壬午猶繹孔子
止譏其繹爾

夏蔡朝吳出奔鄭六月丁巳朔日有食之秋晉荀吳帥
師伐鮮虞冬公如晉

十有六年春齊侯伐徐楚子誘戎蠻子殺之

案十一年楚子虔誘蔡侯般殺之于申名此不名者

狙詐相誘殺略之也故亦不地

夏公至自晉秋八月己亥晉侯夷卒九月大雩季孫意如如晉冬十月葬晉昭公

十有七年春小邾子來朝夏六月甲戌朔日有食之秋郕子來朝八月晉荀吳帥師滅陸渾之戎

陸渾侵畧諸侯得以驅之逐之然滅之則甚矣冬有星孛于大辰

孛字彗之屬孛于大辰者在大辰也大辰大火

楚人及吳戰于長岸

長岸楚地

十有八年春王三月曹伯須卒夏五月壬午宋衛陳鄭
災

壬午宋衛陳鄭災宋衛陳鄭同日而災也宋衛陳鄭
同日而災異之甚者

六月邾人入郕

音禹又
音矩

郕微國

秋葬曹平公冬許遷于白羽

白羽許地

十有九年春宋公伐邾夏五月戊辰許世子止弑其君
買已卯地震秋齊高發帥師伐莒冬葬許悼公

二十年春王正月夏曹公孫會自鄭

音蒙又音
盲亦音夢

出奔宋

鄭公孫會之邑也言自鄭出奔宋者以別從國都而

去爾

秋盜殺衛侯之兄縶

盜者微賤之稱兄母兄也以衛侯之母兄而盜得殺之衛侯之無刑政也若此故曰盜殺衛侯之兄繫以著其惡

冬十月宋華

戶化反

亥向

舒亮反

寧華定出奔陳

三卿並出危之

十有一月辛卯蔡侯廬卒

二十有一年春王三月葬蔡平公夏晉侯使士鞅來聘宋華亥向寧華定自陳入于宋南里以叛

前年出奔當絕復見者以入宋南里叛犯君當誅
秋七月壬午朔日有食之八月乙亥叔輒卒

輒叔弓子

冬蔡侯朱出奔楚公如晉至河乃復

二十有二年春齊侯伐莒宋華亥向寧華定自宋南里
出奔楚大蒐于昌間

昌間魯地

夏四月乙丑天王崩六月叔鞅如京師葬景王

以天子之尊三月而葬此諸侯之不若也叔鞅叔弓子

王室亂劉子單

音善

子以王猛居于皇

王室亂劉子單子以王猛居于皇者王猛當嗣子朝爭立其位未定故也子朝王猛庶兄猛幼子朝有寵于景王王欲立之劉單不可景王崩六月既葬子朝作亂故劉子單子以王猛居于皇其言劉子單子以王猛者子朝亂猛位未定進退在二子也二子卿爵

皇周地

秋劉子單子以王猛入于王城

不言成周而言王城者明未得國也景王失道不能
早正王猛之位卒使子朝爭立故二子以王猛居于
皇以王猛入于王城此猛之進退在二子可知也

冬十月王子猛卒

王猛卒其曰王子猛者言王所以明當嗣之人也言
子所以見未踰年之君也言猛所以別群王之子也

不崩不葬者降成君也

十有二月癸酉朔日有食之

二十有三年春王正月叔孫婼

音綽又音釋

如晉癸丑叔鞅

卒晉人執我行人叔孫婼晉人圍郊

郊周邑

夏六月蔡侯東國卒于楚秋七月莒子庚輿來奔戊辰

吳敗頓胡沈蔡陳許之師于雞父胡子髡沈子逞滅獲

陳夏齧

頓胡沈蔡陳許皆楚與國也六國之師相與伐吳吳人禦之敗六國之師于雞父春秋之戰書敗者多矣未見諸侯之師略而不序者此六國之師略而不序皆甚貶之也賤其從于人而與其難故皆甚貶之也其言胡子髡沈子逞滅者深惡二國之君不得其死皆以自滅為文也故鄭弃其師齊人殲于遂梁亡胡子髡沈子逞滅皆自取之也陳轅不言執而言獲者甚之也雞父楚地

天王居于狄泉

恭王也辟子朝居于狄泉曰天王居于狄泉明正也
尹氏立王子朝

立者篡辭嗣子有常位故不言立王猛恭王是也此
言尹氏立王子朝其惡可知也尹氏世卿

八月乙未地震冬公如晉至河有疾乃復

凡公如晉不得入者六二年公如晉至河乃復十二
年公如晉至河乃復十三年公如晉至河乃復二十

一年公如晉至河乃復此年公如晉至河有疾乃復定三年公如晉至河乃復是也此書有疾明公自有疾而反爾餘則皆譏公數如晉為晉拒而不納以取其辱

二十有四年春王二月丙戌仲孫貜卒姁至自晉

姁叔孫姁也不言叔孫前見也

夏五月乙未朔日有食之秋八月大雩丁酉杞伯郁釐

卒

或作釐音離又音來

冬吳滅巢葬杞平公

二十有五年春叔孫婼如宋夏叔詣會晉趙鞅宋樂大
心衛北宮喜鄭游吉曹人邾人滕人薛人小邾人于黃
父

叔詣叔弓子黃父地闕

有鸛鵒來巢

魯無鸛鵒故言有也又當穴而巢異之甚者

秋七月上辛大雩季辛又雩九月己亥公孫音異于齊

次于陽州

公為季孫意如所逐其言孫于齊者諱奔也內諱奔
皆曰孫次于陽州者不得入于齊也陽州齊魯境上
地

齊侯唁

音彦

公于野井

唁慰安之辭齊大國也不能討意如于魯國徒能唁
昭公于野井此齊侯之惡亦可見也野井齊地

冬十月戊辰叔孫婁卒十有一月己亥宋公佐卒于曲
棘

諸侯卒于國都之外皆地曲棘宋封內邑

十有二月齊侯取鄆

齊侯取鄆以處公也不言處公者明年公至自齊居于鄆此處公可知也

二十有六年春王正月葬宋元公三月公至自齊居于鄆

此言公至自齊者以齊侯之見公可以言至自齊也居于鄆者公為意如所拒不得入于魯也故曰公至

自齊居于鄆

夏公圍成

公圍成書者見國內皆叛也成孟氏邑

秋公會齊侯莒子邾子杞伯盟于鄆

音專又音市
轉反亦音團

陵

盟于鄆陵謀納公而不能也鄆陵地闕

公至自會居于鄆九月庚申楚子居卒冬十月天王入于成周

子朝之亂甚矣悼王既死恭王即位于外四年始勝

其醜反正于宗廟不言歸而言入者言歸嫌與即位
于內者同故變言入以著即位于外也此非例之常
不言王城而言成周者以國舉之明已得國

尹氏召伯毛伯以王子朝奔楚

立王子朝獨書尹氏奔楚并舉召伯者明罪本在尹
氏當先誅逆首後治其徒也

二十有七年春公如齊公至自齊居于鄆夏四月吳弑
其君僚楚殺其大夫卻宛

遠宛
二音

秋晉士鞅宋樂祁犂衛

北宮喜曹人邾人滕人會于扈冬十月曹伯午卒邾快來奔公如齊公至自齊居于鄆

二十有八年春王三月葬曹悼公公如晉次于乾侯

公前年如齊者再皆不見禮故如晉其言次于乾侯者不得入于晉也公既不見禮于齊又不得入于晉其窮辱若此乾侯晉地

夏四月丙戌鄭伯寧卒六月葬鄭定公秋七月癸巳滕子寧卒冬葬滕悼公

二十有九年春公至自乾侯居于鄆

以乾侯至者不得見晉侯故

齊侯使高張來唁公公如晉次于乾侯夏四月庚子叔

詣卒秋七月冬十月鄆潰

潰散也季孫專魯民不附公故鄆潰

三十年春王正月公在乾侯

公在乾侯鄆潰故也不言居者乾侯晉地也鄆魯封
內故曰居乾侯晉地不可言居故曰在內外辭也明

公為強臣所逐不見納于內終顛殞于外故自是歲首孔子皆錄公之所在責魯臣子

夏六月庚辰晉侯去疾卒秋八月葬晉頃

音傾

公冬十

有二月吳滅徐徐子章羽奔楚

三十有一年春王正月公在乾侯季孫意如會晉荀躒于適歷夏四月丁巳薛伯穀卒晉侯使荀躒

力狄反

唁公

于乾侯

季孫意如逐君之賊也晉侯不能討而戮之既使荀

蹶會意如于適歷又使荀躒唁公于乾侯何所為哉
此晉侯之惡亦可見矣適歷晉地

秋葬薛獻公冬黑肱以濫來奔

黑肱以濫來奔濫邑也案襄二十一年邾庶其以漆
閭丘來奔五年莒牟夷以牟婁及防茲來奔邾莒言
國此不言國者脫之也

十有二月辛亥朔日有食之

三十有二年春王正月公在乾侯取闕

口誓反

闕魯邑

夏吳伐越秋七月冬仲孫何忌會晉韓不信齊高張宋仲幾衛世叔申鄭國參曹人莒人薛人杞人小邾人城成周

周自天子言之則曰王城成周昭二十二年劉子單子以王猛入于王城二十六年天王入于成周是也諸侯言之則曰京師僖二十八年晉人執衛侯歸之于京師三十年公子遂如京師遂如晉文元年叔孫

得臣如京師成十三年三月公如京師夏五月公自
京師遂會晉侯齊侯宋公衛侯鄭伯曹伯邾人滕人
伐秦十五年晉侯執曹伯歸于京師十六年曹伯歸
自京師之類是也此不言城京師而曰城成周者不
與大夫城京師也大夫城京師以安天子其言不與
大夫城京師者天子微諸侯又微故諸侯不城京師
而大夫城之也諸侯不城京師而大夫城之是天下
無諸侯也故曰仲孫何忌會晉韓不信齊高張宋仲

幾衛世子申鄭國參曹人莒人薛人杞人小邾人城
成周以惡之

十有二月己未公薨于乾侯

春秋尊王發微卷十

欽定四庫全書

春秋尊王發微卷十一

宋 孫復 撰

定公名宋襄公子昭公弟共王十一年即位定
謚也安民大慮曰定

元年春王

不書正月者定公未立不與季氏承其正朔也是時
季氏專國昭公薨于乾侯及歲之交定又未立故略

不書焉所以黜強臣而存公室也

三月晉人執宋仲幾于京師

春秋之義諸侯不得專執況大夫乎宋仲幾會城成周韓不信陪臣也非天子命執仲幾于天子之側甚矣故曰晉人執宋仲幾于京師以疾之

夏六月癸亥公之喪至自乾侯戊辰公即位

定公繼奔亡之後制在季氏故昭公之喪至自乾侯六月而始得即位也昭公之喪至自乾侯六月而始

得即位此制在季氏可知也故曰癸亥昭公之喪至
自乾侯戊辰公即位以著其惡

秋七月癸巳葬我君昭公

八月而葬

九月大雩立煬宮

煬宮伯禽子廟毀已久此而立之非禮可知

冬十月隕霜殺菽

建酉之月隕霜殺菽非常之災

二年春王正月夏五月壬辰雉門及兩觀

古亂反災

其言雉門及兩觀災者雉門與兩觀俱災也雉門兩

觀天子之制

秋楚人伐吳冬十月新作雉門及兩觀

古亂反

新作雉門及兩觀者定公不知僭天子之惡也定公不知僭天子之惡故作而新之

三年春王正月公如晉至河乃復二月辛卯邾子穿卒
夏四月秋葬邾莊公冬仲孫何忌及邾子盟于掖

拔地闕

四年春王二月癸巳陳侯吳卒三月公會劉子晉侯宋公蔡侯衛侯陳子鄭伯許男曹伯莒子邾子頓子胡子滕子薛伯杞伯小邾子齊國夏于召上照反陵侵楚

蔡人病楚使告于晉故晉合諸侯于此此救蔡伐楚也其言會于召陵侵楚者諸侯不振不能救蔡伐楚也故使救蔡伐楚之功歸于強吳冬蔡侯以吳子及楚人戰于柘舉楚師敗績是也噫昭十三年公會劉

子晉侯齊侯宋公衛侯鄭伯曹伯莒子邾子滕子薛
伯杞伯小邾子于平丘八月甲戌同盟于平丘此年
公會劉子晉侯宋公蔡侯衛侯陳子鄭伯許男曹伯
莒子邾子頓子胡子滕子薛伯杞伯小邾子齊國夏
于召陵侵楚五月公及諸侯盟于皐鼬內不能奪大
夫之權外不能攘荆蠻之患何所為哉何所為哉徒
自相與歃血要言而已此固不足道也

夏四月庚辰蔡公孫姓

音生

帥師滅沈以沈子嘉歸殺

之

蔡公孫姓帥師滅沈沈與楚故也以沈子嘉歸殺之
公孫姓之罪不容誅也

五月公及諸侯盟于臯鼬

音又

臯鼬鄭地

杞伯成卒于會六月葬陳惠公許遷于容成秋七月公

至自會劉卷

音權又音
卷勉反

卒

上會劉子

葬杞悼公楚人圍蔡晉士鞅衛孔圉帥師伐鮮虞葬劉
文公

文謚也案文三年王子虎卒不葬此葬者見其私謚
且僭也

冬十有一月庚午蔡侯以吳子及楚人戰于柘舉楚師
敗績楚囊瓦出奔鄭

以者乞師而用之也楚人圍蔡晉師不出故蔡侯去
晉求救于吳吳子許之冬十有一月吳子蔡侯伐楚

庚午及楚人戰于栢舉楚師敗績囊瓦奔鄭吳稱子
者大救蔡也晉合十八國之君不能救蔡伐楚吳能
救之伐之此吳晉之事強弱之勢較然可見也故自
是諸侯小大皆宗于吳栢舉楚地

庚辰吳入郢

吳子救蔡伐楚善也乘囊瓦之敗長驅入郢夷其宗
廟壞其宮室此則甚矣故曰庚辰吳入郢反狄之也
五年春王三月辛亥朔日有食之夏歸粟于蔡於越入

吳

案昭五年越始見于經從諸侯伐吳稱人此言於越之別封也此亦舒人舒鳩舒蓼之類耳

六月丙申季孫意如卒秋七月壬子叔孫不敢卒冬晉士鞅帥師圍鮮虞

六年春王正月癸亥鄭游速帥師滅許以許男斯歸二月公侵鄭

內有強臣之讎外結怨于鄭

公至自侵鄭夏季孫斯仲孫何忌如晉秋晉人執宋行人樂祁犂冬城中城季孫斯仲孫忌帥師圍鄆

前曰仲孫何忌後曰仲孫忌傳寫脫之也

七年春王正月夏四月秋齊侯鄭伯盟于鹹齊人執衛行人北宮結以侵衛齊侯衛侯盟于沙

沙衛地

大雩齊國夏帥師伐我西鄙九月大雩冬十月

八年春王正月公侵齊公至自侵齊二月公侵齊三月

公至自侵齊

公一歲而再侵齊以重其怨甚矣

曹伯露卒夏齊國夏帥師伐我西鄙公會晉于瓦

晉師救我故公會于瓦瓦衛地

公至自瓦秋七月戊辰陳侯柳卒晉士鞅帥師侵鄭遂
侵衛葬曹靖公九月葬陳懷公季孫斯仲孫何忌帥師
侵衛冬衛侯鄭伯盟于曲濮從祀先公

先公后稷也從祀先公者定公僭亂從后稷而祀也

后稷周之始祖非魯可得祀故曰從祀先公以著其
僭

盜竊寶王大弓

盜微賤之稱寶王大弓國之重器也國之重器而盜
得竊之則定公為國可知也

九年春王正月夏四月戊申鄭伯蠆卒得寶王大弓

不曰盜歸寶王大弓者盜微賤不可再見也寶王大
弓周公受賜于周藏之于魯故失之書得之書

六月葬鄭獻公秋齊侯衛侯次于五氏

五氏晉地

秦伯卒冬葬秦哀公

十年春王三月及齊平

平八年再侵齊之怨

夏公會齊侯于夾谷公至自夾谷

公會齊侯于夾谷叛晉故也夾谷齊地

晉趙鞅帥師圍衛齊人來歸鄆謹龜陰田

三月及齊平夏公會齊侯于夾谷故齊人來歸鄆謹
龜陰田其言來歸者明本非魯地也

叔孫州仇仲孫何忌帥師圍郕秋叔孫州仇仲孫何忌
帥師圍郕音后

郕叛叔孫州仇仲孫何忌帥師圍之郕不服故二卿
秋再圍郕叔孫邑

宋樂大心出奔曹宋公子地出奔陳冬齊侯衛侯鄭游
速會于安甫

安甫地關

叔孫州仇如齊宋公之弟辰暨仲佗

徒何反

石彊

苦侯反

出

奔陳

宋公失道其弟辰暨仲佗石彊出奔陳暨不得已也
仲佗石彊為宋大臣不能以道事君為辰强牽而去
故曰宋公之弟辰暨仲佗石彊出奔陳以交譏之也
十有一年春宋公之弟辰及仲佗石彊公子地自陳入
于蕭以叛夏四月秋宋樂大心自曹入于蕭

大心從四子入于蕭不言叛者其叛可知也

冬及鄭平

平六年侵鄭之怨

叔還如鄭涖盟

叔還叔弓曾孫

十有二年春薛伯定卒夏葬薛襄公叔孫州仇帥師墮

許規反 郕衛公孟彊帥師伐曹季孫斯仲孫何忌帥師墮

費

音秘

秋大雩冬十月癸亥公會齊侯盟于黃十有一

月丙寅朔日有食之公至自黃十有二月公圍成公至
自圍成

邠叔孫邑費季孫邑成孟孫邑三邑强盛宰吏數叛
以為國患故皆墮之經言叔孫州仇帥師墮邠季孫
斯仲孫何忌帥師墮費而獨書公圍成者公弗能墮
成也三子能墮邠墮費而公弗能墮成公室陵遲政
在三子故也國內又以圍至者君弱臣强危甚

十有三年春齊侯衛侯次于垂葭夏築蛇淵圃大蒐于

比

音毗

蒲衛公孟彊帥師伐曹秋晉趙鞅入于晉陽以

叛冬晉荀寅士吉射

音石

入于朝歌以叛晉趙鞅歸于

晉

趙鞅荀寅士吉射三卿專邑以叛晉侯不能制趙鞅
歸于晉無惡文者鞅入晉陽以叛此王法所誅也鞅
不遠而復以晉陽歸國此王法所赦也故曰秋晉趙
鞅入于晉陽以叛冬晉荀寅士吉射入于朝歌以叛
晉趙鞅歸于晉以甚荀寅士吉射之惡也晉陽趙鞅

邑朝歌晉邑

薛弑其君比

十有四年春衛公叔成來奔衛趙陽出奔宋二月辛巳

楚公子結陳公孫佗人帥師滅頓以頓子牂歸夏衛北

宮結來奔五月於越敗吳于檣

音醉

李

檣李吳地

吳子光卒公會齊侯衛侯于牽

牽衛地

公至自會秋齊侯宋公會于洮天王使石尚來歸脤

市軫

反

脤祭肉也天子祭社稷宗廟有與諸侯共福之禮此
謂助祭諸侯也魯未嘗助祭天王使石尚來歸脤非
禮也石尚士故名

衛世子蒯

苦怪反

黷

伍怪反

出奔宋衛公孟彊出奔鄭宋公

之弟辰自蕭來奔大蒐于比

音毗

蒲邾子來會公

會公于比蒲也

城莒父及霄

此年無冬脫之

十有五年春王正月邾子來朝麇鼠食郊牛牛死改卜
牛

不言所食者食非一處也

二月辛丑楚子滅胡以胡子豹歸夏五月辛亥郊壬申
公薨于高寢

公薨于高寢非正也高寢別寢

鄭罕達帥師伐宋齊侯衛侯次于渠蒚邾子來奔喪

邾子來奔喪非禮也

秋七月壬申姒氏卒

姒氏哀公妾母不稱夫人不言薨哀未君也姒氏杞女

八月庚辰朔日有食之九月滕子來會葬

滕子來會葬非禮也

丁巳葬我君定公雨不克葬戊午日下昃乃克葬

雨不克葬譏不能葬也葬不為雨止戊午日下是乃
克葬言無備之甚也義與宣八年葬敬嬴同

辛巳葬定姒冬城漆

漆魯地

春秋尊王發微卷十一

欽定四庫全書

春秋尊王發微卷十二

宋 孫復 撰

哀公名蔣定公子共王二十六年即位哀謚也

恭仁短折曰哀

元年春王正月公即位楚子陳侯隨侯許男圍蔡

楚子以諸侯圍蔡報栢舉也案定六年鄭遊速帥師滅許以許男斯歸此復見者蓋鄭滅之為附庸楚再

使列于諸侯耳栢舉在定四年

鼯鼠食郊牛改卜牛夏四月辛巳郊秋齊侯衛侯伐晉
冬仲孫何忌帥師伐邾

二年春王二月季孫斯叔孫州仇仲孫何忌帥師伐邾

取漵

火號反
又音郭

東田及沂西田

案襄十九年取邾田自漵水今三卿帥師伐邾又取
漵東田及沂西田故列數之以重其惡

癸巳叔孫州仇仲孫何忌及邾子盟于句繹

季孫斯叔孫州仇仲孫何忌伐邾取漵東田及沂西
田叔孫州仇仲孫何忌又要邾子以盟甚矣句繹邾
地

夏四月丙子衛侯元卒滕子來朝晉趙鞅帥師納衛世
子蒯聵于戚

夏四月衛靈公卒衛人立輒輒者蒯聵之子也故晉
趙鞅帥師納蒯聵于戚其言于戚者為輒所拒不得
入于衛也案定十四年衛世子蒯聵出奔宋靈公既

卒輒又已立猶稱曩日之世子蒯瞶當嗣惡輒貪國
叛父逆亂人理以滅天性孔子正其名而書之也故
子路問于孔子曰衛君待子而為政子將奚先孔子
曰必也正名乎名不正則言不順言不順則事不成
事不成則禮樂不興禮樂不興則刑罰不中刑罰不
中則民無所措手足又冉有曰夫子為衛君乎子貢
曰諾吾將問之入曰伯夷叔齊何人也曰古之賢人
也怨乎曰求仁而得仁又何怨此聖師之旨可得而

見矣故蒯瞶出入皆正其世子之名書之所以篤君臣父子之大經也不然貪國叛父之人接踵于萬世矣

秋八月甲戌晉趙鞅帥師及鄭罕達帥師戰于鐵鄭師敗績

皆言帥師者其衆敵也鐵衛地

冬十月葬衛靈公

七月而葬

十有一月蔡邕于州來蔡殺其大夫公子駟

三年春齊國夏衛石曼姑帥師圍戚

齊國夏序衛石曼姑上者齊國夏主乎圍戚也案襄
元年仲孫蔑會晉欒黶宋華元衛甯殖曹人莒人邾
人滕人薛人圍宋彭城此不言圍衛戚者不與國夏
助輒圍父也國夏助輒圍父逆亂人理莫甚于此故
曰齊國夏衛石曼姑帥師圍戚以誅其惡

夏四月甲午地震五月辛卯桓宮僖宮災

諸侯五廟親盡則毀威僖不毀非禮也故孔子因其災而並錄之不言及者親盡故也

季孫斯叔孫州仇帥師城啓陽

啓陽魯邑

宋樂髡帥師伐曹秋七月丙子季孫斯卒蔡人放其大夫公孫獵于吳冬十月癸卯秦伯卒叔孫州仇仲孫何忌帥師圍邾

四年春王二月庚戌盜殺蔡侯申

盜者微賤之稱不言弑者賤盜也其曰盜殺蔡侯申
責蔡臣子不能拒難

蔡公孫辰出奔吳葬秦惠公宋人執小邾子夏蔡殺其

大夫公孫姓

音生

公孫霍晉人執戎蠻子赤歸于楚

蠻夷猾夏久矣晉人執戎蠻子不歸于京師而歸于
楚其惡可知也

城西郭六月辛丑亳社災

亳社亡國之社也武王克商作亳社于廟以為天子

戒魯作亳社非禮也亡國之社屋故有災

秋八月甲寅滕子結卒冬十有二月葬蔡昭公葬滕頃
公五年春城毗

毗魯邑

夏齊侯伐宋晉趙鞅帥師伐衛秋九月癸酉齊侯杵臼
卒冬叔還音旋如齊閏月葬齊景公

閏月喪事不數葬齊景公非禮也春秋二百四十二
年書閏者惟文六年不告月此年葬齊景公爾皆譏

其變常也且三年之喪練祥各有其月此非禮可知
六年春城邾瑕晉趙鞅帥師伐鮮虞吳伐陳夏齊國夏
及高張來奔叔還會吳于祖莊加反秋七月庚寅楚子軫
卒齊陽生入于齊齊陳乞弑其君荼冬仲孫何忌帥師
伐邾宋向巢帥師伐曹

七年春宋皇瑗帥師侵鄭晉魏曼多帥師侵衛夏公會
吳于鄆秋公伐邾八月己酉入邾以邾子益來

邾吳與國公秋伐邾八月己酉入邾以邾子益來甚

矣結怨強吳以取困辱明年吳伐我是也邾子名責
不死社稷

宋人圍曹冬鄭駟弘帥師救曹

八年春王正月宋公入曹以曹伯陽歸吳伐我

吳伐我以邾子益來故也直曰伐我者兵加于都城
也

夏齊人取讎

音讎

及闡

尺善反

公前年入邾以邾子益來益齊甥也故齊人取讎及

闡

歸邾子益于邾秋七月冬十有二月癸亥杞伯過

音戈

卒齊人歸謹及闡

公既歸邾子益于邾故齊人歸謹及闡凡土地諸侯取之歸之皆書者惡專恣也取而不歸則又甚矣

九年春王二月葬杞僖公宋皇瑗帥師取鄭師于雍

於勇

反丘

鄭人圍宋雍丘宋皇瑗帥師救之取鄭師于雍丘鄭

師不戒也

夏楚人伐陳秋宋公伐鄭冬十月

十年春王二月邾子益來奔公會吳伐齊

公會吳伐齊齊中國也吳也伐中國其惡

可知也

三月戊戌齊侯陽生卒夏宋人伐鄭晉趙鞅帥師侵齊
五月公至自伐齊葬齊悼公衛公孟彊自齊歸于衛薛
伯夷卒秋葬薛惠公冬楚公子結帥師伐陳吳救陳

十有一年春齊國書帥師伐我

公前年會吳伐齊故齊國書帥師伐我

夏陳轅頗出奔鄭五月公會吳伐齊甲戌齊國書帥師
及吳戰于艾陵齊師敗績獲齊國書

公再會吳伐齊戰于艾陵不言公者公與

音喻下同

上伐

不與下戰也

秋七月辛酉滕子虞母卒冬十有一月葬滕隱公衛世

叔齊出奔宋

十有二年春用田賦

田者井田也賦者財賦也宣公奢泰始什二而稅至于哀公則又甚焉哀公不道既什二而稅其田又什二而歛其財故曰用田賦言用田以為財賦之率也夏五月甲辰孟子卒

吳女昭公夫人其曰孟子卒諱取同姓也不言葬者略之也故陳司敗問昭公知禮乎孔子曰知禮孔子退揖巫馬期而進之曰吾聞君子不黨君子亦黨乎

君取于吳為同姓謂之吳孟子君而知禮孰不知禮
巫馬期以告子曰丘也幸苟有過人必知之

公會吳于橐皋秋公會衛侯宋皇瑗于鄭

音云

宋向巢

帥師伐鄭冬十有二月螽

周之十二月夏之十月也為異之甚

十有三年春鄭罕達帥師取宋師于岳

宋向巢帥師伐鄭鄭罕達帥師取宋師于岳報雍丘
之師也案九年宋皇瑗帥師取鄭師于雍丘二國覆

師以相償報其惡如此

夏許男成卒公會晉侯及吳子于黃池

黃池之會其言公會晉侯及吳子者主在吳子也黃池之會不主晉侯而主吳子者蓋晉侯不能主諸侯故也吳自栢舉之戰勢橫中國諸侯小大震栗皆宗于吳晉侯不見者二十四年此不能主諸侯可知也故黃池之會吳子主焉不言公會吳子晉侯者不與吳子主盟故也不與吳子主盟者惡吳僭故也案吳

定四年入楚哀六年伐陳夏叔還會祖七年公會鄆
八年伐我十年公會伐齊十一年公會伐齊十二年
公會橐臯皆曰吳以外之此稱子復舊爵也噫吳楚
之君狂僭之惡罪在不赦故宜終春秋之世貶之孔
子不終春秋之世貶之者傷聖王不作名分失正之
甚也鄉使聖王興百度脩萬物遂則九州四海皆將
重譚襁負其子而至矣又安有奔軼狂僭肆誅伐專
盟會之事哉此孔子之深旨也黃池衛地栢舉之戰

在定四年

楚公子申帥師伐陳於越入吳

於越入吳吳子方會乘其無備也

秋公至自會晉魏曼多帥師侵衛葬許元公九月螽冬

十有一月有星孛

音佩

于東方

光芒四出曰孛不言所在之次者見于旦也案文十
四年有星孛入于北斗昭十七年有星孛入于大辰
此不言所在之次者見于旦可知也

盜殺陳夏區

音甌

夫十有二月蝨

十有四年春西狩獲麟

狩未有言其所獲者此言西狩獲麟何也傷之也孔子傷麟之見獲與孔子傷聖王不作聖道遂絕非傷麟之見獲也然則曷為絕筆于此前此猶可言也後此不可言也天子失政自東邇始諸侯失政自會湫


古役反又音古壁反

梁始故自隱公至于湫梁之會天下之政

中國之事皆諸侯分裂之自湫梁之會至于申之會

天下之政中國之事皆大夫專執之自申之會至于
獲麟天下之政會盟征伐皆吳楚迭制之聖王憲度
禮樂衣冠遺風舊政蓋掃地矣周道淪胥逮此而盡
前此猶可言者黃池之會晉魯在焉後此不可言者
諸侯泯泯制命在吳無復天子會盟征伐之事也是
故春秋尊天子褒齊晉褒齊晉所以貶吳楚也尊天
子所以黜諸侯也尊天子黜諸侯始于隱公是也褒
齊晉貶吳楚終于獲麟是也嗚呼其旨微哉其旨微

哉



春秋尊王發微卷十二

舉張問孫復狀

范文正公文

右臣伏覩赦書節文一應天下懷材抱器或淹下位或
滯草萊委逐處具事由聞奏臣觀國家居安思危搜羅
賢俊以充庶位使民受賜此安邦之正體也臣竊見試
將作監主簿張問文學履行有名于時前應茂材異等
科再考中式以父喪不得就試近上封事始霑國恩職
不稱才衆知沉落臣又見兗州仙源縣寄居孫復元是
開封府進士曾到御前素負詞業經術今退隱泰山著

書不仕心通聖奧跡在窮谷伏望朝廷依赦文採擢張
問乞除一陝西藩鎮職事官孫復乞賜召試特加甄獎
庶幾聖朝渙汗被于幽滯

孫先生墓誌銘

并序

歐陽文忠公

先生諱復字明復姓孫氏晉州平陽人也少舉進士不
中退居泰山之陽學春秋著尊王發微魯多學者其尤
賢而有道者石介自介而下皆以弟子事之先生年逾
四十家貧不娶李丞相迪將以其弟之女妻之先生疑

馬介與群弟子進曰公卿不下士久矣今丞相不以先生貧賤而欲託以子是高先生之行義也先生宜因以成丞相之賢名于是乃許孔給事道輔為人剛直嚴重不妄與人聞先生之風就見之介執杖屨侍左右先生坐則立升則降拜則扶之及其往謝也亦然魯人既素高此兩人由是始識師弟子之禮莫不嘆嗟之而李丞相孔給事亦以此見稱于士大夫其後介為學官語于朝曰先生非隱者也欲仕而未得其方也慶歷二年樞

密副使范仲淹資政殿學士富弼言其道德經術宜在
朝廷召拜校書郎國子監直講嘗召見通英閣說詩將
以為侍講而嫉之者言其講說多異先儒遂止七年徐
州人孔直溫以狂謀捕治索其家得詩有先生姓名坐
貶監虔州商稅徙泗州又徙知河南府長水縣簽署應
天府判官公事通判陵州翰林學士趙槩等十餘人上
言孫某行為世法經為人師不宜棄之遠方乃復為國
子監直講居三歲以嘉祐二年七月某日以疾卒于家

享年六十有六官至殿中丞先生在太學時為大理評事天子臨幸賜以緋衣銀魚及聞其喪惻然予其家錢十萬而公卿大夫朋友太學之諸生相與吊哭賻治其喪于是以某年某月某日葬先生于鄆州須城縣廬泉鄉之北扈原先生治春秋不惑傳註不為曲說以亂經其言簡易明于諸侯大夫功罪以考時之盛衰而推見王道之治亂得于經之本義為多方其病時樞密使韓琦言之天子選書吏給紙筆命其門人祖無擇就其家

得其書十有五篇錄之藏于秘閣先生一子大年尚幼
銘曰

聖既歿經更戰焚逃藏脫亂僅傳存衆說乘之汨其原
恠迂百出雜偽真後生牽卑習前聞有欲患之寡攻群
往往止燎以膏薪有勇夫子闢浮雲刮磨蔽蝕相吐吞
日月卒復光破昏博哉功利無窮垠有考其不在斯文